

E tres personanan cu probable Chikungunya mester keda diez dia isola



ORANJESTAD (AAN) – Sra. Lativa Mercera, Verpleegster Titula di Seccion Malesanan Contagioso di Departamento Salubridad Publico, den conferencia di prensa a amplia riba e tres casonan sospechoso y importa di Chikungunya, detecta na Aruba.

Sra. Mercera a indica cu ora e melding a dreña na DVZ e mesun momento a tuma contacto cu Epidemiologia, GKMB y Management Team y a pone nan na haltura di e situacion.

El a menciona cu e personanan a bin na Seccion di Malesa Contagioso, na unda nan a haci un “intake”. Dos di e tres personanan a bin for di Sint Maarten parti Frances y uno di e parti Hulandes.

Investigacionnan a cuminsa na e momento ey, y nan a uza e mesun tipo di formulario di Dengue. Seccion di Epidemiologia a tuma contacto cu Carfa, y dr. Salazar a pasa wak e personanan, haci su preguntanan y DVZ a tuma muestra di sanger, cual a wordo manda Hulanda pa e Laboratorio di referencia, y asina aki e investigacionnan ta tumando lugar. Tambe GKMB a presenta y nan a bay na e casnan concerni y haci nan debido control, y como caso

sospechoso a spuit e area fiha den e protocol.

Awor tin cu warda entre ocho pa diez dia pa confirma e diagnostico en caso positivo. E personanan a wordo pidi pa no traha y keda isola den nan mes cas pa no menos di diez dia y uza un net den nan cas, pa evita pica di sangura pa e malesa no plama den un rato.

Seccion di Malesa Contagioso ta keda den contacto cu e pacientnan, nan ta yama nan na telefon.